

UROXATE TABLET 100MG

Flavoxate Hydrochloride (100 mg)

Apakah yang ada pada risalah ini

1. Apakah kegunaan UROXATE
2. Bagaimana UROXATE berfungsi
3. Sebelum menggunakan UROXATE
4. Cara menggunakan UROXATE
5. Semasa menggunakan UROXATE
6. Kesan-kesan sampingan
7. Cara penyimpanan dan pelupusan UROXATE
8. Maklumat lanjut
9. Pengilang dan Pemegang Pendaftaran Produk
10. Tarikh kemaskini RiMUP

Apakah kegunaan UROXATE

UROXATE digunakan untuk melegakan simptom-simptom seperti kesakitan semasa membuang air kencing, rasa terdesak untuk membuang air kencing, kerap membuang air kencing terutamanya pada waktu malam, rasa sakit pada bahagian bawah abdomen dan kehilangan kawalan membuang air kencing, yang mungkin disebabkan oleh keradangan pada pundi kencing, kelenjar prostat atau saluran kencing.

Bagaimana UROXATE berfungsi

UROXATE mengandungi bahan aktif Flavoxate hydrochloride. Ubat ini berfungsi untuk mencegah dan melegakan kekejangan otot dan seterusnya menghalang pengecutan pundi kencing pada saluran kencing dan juga mengurangkan kesakitan yang berkaitan.

Sebelum menggunakan UROXATE

- Bila tidak boleh menggunakan

Jangan mengambil UROXATE jika anda:

- alah terhadap flavoxate hydrochloride atau bahan-bahan lain dalam formulasi ini.
- mempunyai halangan perut atau usus.
- mengalami pendarahan di dalam perut atau usus anda.
- menghidap achalasia (sejenis gangguan menelan yang jarang berlaku).
- mengalami masalah untuk mengosongkan pundi kencing anda sepenuhnya (pengekalan kencing).
- menghidap glaukoma (tekanan tinggi dalam mata).
- mengalami satu keadaan di mana otot menjadi lemah (myasthenia gravis).

- Sebelum mula menggunakan UROXATE

Beritahu doktor anda jika anda mempunyai alahan terhadap sebarang ubat, makanan, bahan pengawet atau pewarna.

Bincang dengan doktor anda jika anda:

- mempunyai masalah buah pinggang.

UROXATE tidak disyorkan untuk kanak-kanak di bawah usia 12 tahun.

Jika anda tidak pasti sama ada anda perlu mula mengambil ubat ini, sila rujuk kepada doktor anda.

- Jika mengambil ubat-ubat lain

Maklumkan kepada doktor atau ahli farmasi jika anda sedang mengambil sebarang ubat, termasuk ubat-ubatan yang didapatkan tanpa preskripsi.

Sesetengah ubat boleh berinteraksi dengan UROXATE. Adalah penting untuk memberitahu doktor atau ahli farmasi anda jika anda sedang mengambil:

- Ubat antimuskarinik lain (cth. atropine, scopolamine).
- Ubat-ubatan lain yang digunakan untuk merawat masalah saluran kencing cth. Bethanechol.

- Semasa mengandung dan menyusukan bayi

Jika anda hamil atau sedang menyusukan anak, fikir anda mungkin hamil atau merancang untuk hamil, dapatkan nasihat doktor atau ahli farmasi sebelum mengambil ubat ini.

Keselamatan mengenai penggunaan ubat ini semasa kehamilan atau menyusukan anak masih belum dipastikan. Elakkan penggunaan semasa kehamilan kecuali tiada alternatif yang lebih selamat.

Ia tidak diketahui sama ada ubat ini akan meresap ke dalam susu ibu. Bincang dengan doktor anda sebelum menyusukan bayi anda.

Cara menggunakan UROXATE

Ambil ubat ini seperti yang diarahkan oleh doktor atau ahli farmasi anda. Jika anda tidak pasti, sila rujuk kepada doktor atau ahli farmasi anda.

- Berapa banyak harus digunakan

Dewasa dan kanak-kanak 12 tahun ke atas

Dos yang disarankan adalah satu atau dua biji tablet diambil 3 atau 4 kali sehari. Doktor anda mungkin akan mengurangkan dos anda sekiranya simptom anda telah bertambah baik.

- Bila perlu digunakan

Telan seluruh tablet dengan air. Ubat ini boleh diambil dengan atau tanpa makanan. Ambil ubat anda pada masa yang tetap setiap hari akan memberi kesan yang terbaik. Ini juga membantu anda mengingat masa pengambilan ubat.

- Berapa lama perlu digunakan

Teruskan pengambilan ubat ini selagi diarahkan oleh doktor anda. Ubat ini membantu mengawal keadaan anda tetapi tidak menyembuhkannya. Adalah penting untuk terus mengambil ubat ini walaupun anda telah berasa sihat.

- Jika terlupa menggunakan

Ambil dos yang terlepas sebaik sahaja anda teringat dan kembali mengambil ubat anda seperti biasa. Sekiranya sudah hampir masa untuk dos seterusnya, abaikan dos terlepas dan tunggu untuk mengambil dos seterusnya pada masa biasa. Jangan ambil dos berganda untuk menggantikan dos yang tertinggal. Tanya doktor atau ahli farmasi anda jika anda tidak pasti apa yang perlu dilakukan.

- Jika mengambil berlebihan (terlebih dos)

Hubungi doktor anda dengan segera atau pergi ke Jabatan Kecemasan hospital terdekat, jika anda atau sesiapa terambil dos berlebihan. Ini perlu dilakukan walaupun tiada sebarang tanda ketidakselesaan atau keracunan. Anda mungkin memerlukan rawatan perubatan segera. Bawa bersama bungkusan atau baki ubat yang selebihnya dengan anda.

Simptom-simptom terlebih dos termasuk: kadar denyutan jantung meningkat, jantung berdegup kencang, mulut kering, penglihatan kabur, masalah pertuturan, mengantuk, kesukaran untuk menelan, keresahan, cirit-birit atau sembelit, kulit kering dan panas, demam.

Semasa menggunakan UROXATE

- Perkara yang perlu dilakukan

- Sentiasa mengambil ubat anda mengikut arahan yang diberikan oleh doktor atau ahli farmasi anda.
- Jika anda akan mula mengambil sebarang ubat baru, ingatkan doktor atau ahli farmasi anda bahawa anda sedang mengambil UROXATE.
- Beritahu doktor anda dengan segera jika

anda hamil atau merancang untuk hamil semasa mengambil ubat ini.

• Maklumkan kepada doktor atau ahli farmasi anda dengan segera jika anda mendapati sebarang kesan sampingan, atau kesan sampingan menjadi serius atau apa-apa yang menyebabkan anda berasa kurang sihat.

- Perkara yang tidak boleh dilakukan

• Jangan berikan ubat ini kepada sesiapa, walaupun mereka mempunyai keadaan yang sama seperti anda.

• Jangan berhenti mengambil ubat anda atau mengubah dos tanpa merujuk kepada doktor anda.

• Jangan menggunakan UROXATE untuk merawat masalah lain kecuali atas nasihat doktor.

- Perkara yang perlu diberi perhatian

UROXATE mengandungi laktosa. Jika anda telah diberitahu oleh doktor anda bahawa anda tidak bertoleransi terhadap sesetengah jenis gula, hubungi doktor anda sebelum mengambil ubat ini.

Memandu dan menggunakan jentera

UROXATE mungkin menyebabkan rasa mengantuk atau penglihatan kabur pada sesetengah orang. Jika anda mengalami mana-mana simptom tersebut, jangan memandu kereta, mengendalikan mesin atau melakukan perkara yang mungkin membahayakan anda.

Kesan-kesan sampingan

Seperti ubat-ubatan lain, UROXATE boleh menyebabkan kesan sampingan, walaupun bukan semua orang akan mengalaminya.

Loya (mual), muntah-muntah, mulut kering, sakit kepala, mengantuk, pening, penglihatan kabur dan kegelisahan mungkin berlaku. Sekiranya mana-mana kesan ini berterusan atau bertambah buruk, beritahu doktor atau ahli farmasi anda dengan segera.

Beritahu doktor anda dengan segera jika anda mengalami kesan sampingan berikut yang tidak kerap berlaku tetapi serius:

- loya/muntah/sembelit yang berterusan
- perubahan mental/emosi (cth. kekeliruan)
- sakit mata

Beritahu doktor anda dengan segera jika anda mengalami kesan sampingan berikut yang jarang berlaku tetapi sangat serius:

- sakit dada
- jantung berdegup kencang/pantas

- gejala-gejala jangkitan (cth. demam, sakit tekak yang berterusan)
- sukar atau sakit semasa membuang air kencing

Reaksi alahan yang sangat serius terhadap ubat ini adalah jarang berlaku. Walau bagaimanapun, dapatkan rawatan perubatan segera jika anda mengalami tanda-tanda reaksi alahan yang serius, termasuk:

- ruam
- gatal/bengkak (terutamanya pada muka, lidah, tekak)
- pening yang teruk
- masalah pernafasan

Beritahu doktor atau ahli farmasi anda jika anda mengalami kesan sampingan lain yang menyebabkan anda berasa kurang sihat. Kesan sampingan lain yang tidak disenaraikan di atas mungkin berlaku di kalangan sesetengah orang.

Anda boleh melaporkan sebarang kesan sampingan atau kesan advers ubat kepada Pusat Pemantauan Kesan Advers Ubat Kebangsaan melalui laman web nppra.gov.my [*Consumers* → *Reporting Side Effects to Medicines (ConSERF) or Vaccines (AEFI)*].

Cara penyimpanan dan pelupusan UROXATE

- Penyimpanan

Simpan di tempat yang sejuk dan kering di bawah suhu 30° C.

Lindungi daripada cahaya.

Jangan tinggalkan ubat anda di dalam kereta. Jauhkan ubat daripada capaian kanak-kanak.

- Pelupusan

Ubat-ubatan tidak harus dilupuskan melalui air buangan atau sisa isi rumah. Sila rujuk kepada ahli farmasi anda mengenai cara yang betul untuk melupuskan ubat yang tidak diperlukan lagi. Langkah-langkah ini dapat membantu melindungi alam sekitar.

Maklumat lanjut

- Rupa dan warna produk

UROXATE adalah tablet bersalut filem yang berwarna putih dan berbentuk bulat dwicembung, bertanda “SPS” pada satu permukaan dan tiada sebarang tanda pada permukaan yang lain.

- Bahan-bahan kandungan

- Bahan Aktif
Flavoxate hydrochloride 100 mg

- Bahan tidak aktif

Teras tablet: Lactose, sodium starch glycolate, talcum, hypromellose, colloidal silicon dioxide, microcrystalline cellulose, magnesium stearate

Salutan filem: Eudragit, titanium dioxide, hypromellose, talcum, polyethylene glycol, simethicone emulsion

- Bungkus

Pek blister 10 biji yang dibungkus dalam 100 dan 500 tablets sekotak.

- Nombor MAL

MAL19989027AZ

Pengilang

Sriprasit Pharma Co., Ltd.

216 Moo 6 Suanluang, Krathum Baen, Samut Sakhon 74110, Thailand.

Pemegang Pendaftaran Produk

IMEKS Pharma Sdn. Bhd.

No. 5 & 9, Jalan Udang Harimau 2, Medan Niaga Kepong, 51200 Kuala Lumpur, Malaysia.

Tarikh kemaskini RiMUP

23/10/2024

Nombor Siri

NPRA(R2/1)220908/954